

**SOALAN NO. 194**

**PEMBERITAHUAN PERTANYAAN DEWAN RAKYAT**

**PERTANYAAN : JAWAB BUKAN LISAN**

**DARIPADA : PUAN KASTHURIRAANI A/P PATTO  
[BATU KAWAN]**

**TARIKH : 9 JUN 2014 (ISNIN)**

**SOALAN :**

Puan Kasthurirani a/p Patto [ Batu Kawan ] minta **MENTERI PEMBANGUNAN WANITA, KELUARGA DAN MASYARAKAT** menyatakan justifikasi bayaran kebajikan serendah RM100 bagi golongan yang kurang bernasib baik dan jika ada cadangan untuk menambah amaun itu selepas GST dilaksanakan terutama sekali bagi golongan ibu tunggal dan bapa tunggal.

**JAWAPAN:**

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) sentiasa komited dalam memberi perkhidmatan kepada kumpulan sasar termasuk ibu dan bapa tunggal bagi meningkatkan kualiti hidup serta kesejahteraan golongan tersebut.

KPWKM sentiasa prihatin terhadap masalah kos sara hidup yang semakin tinggi dan cabaran yang dihadapi kumpulan sasar dengan mengkaji semula kadar bantuan dan kelayakan bagi permohonan bantuan dari masa ke semasa. Bagi memastikan kadar skim bantuan yang disediakan sentiasa relevan dengan keadaan semasa, KPWKM telah mengguna pakai mekanisme kriteria kelayakan berdasarkan Pendapatan Garis Kemiskinan (PGK) yang telah ditetapkan oleh Unit Perancang Ekonomi (EPU), Jabatan Perdana Menteri (JPM) untuk menentukan kelayakan menerima bantuan kebajikan.

KPWKM melalui JKM menyediakan pelbagai bantuan kebajikan kepada golongan yang memerlukan dengan kadar serendah RM100 kerana jenis

dan kadar bantuan adalah diberi berdasarkan kepada pengiraan mengikut bilangan kumpulan sasar yang menerima bantuan tersebut. Sebagai contoh, Bantuan Kanak-Kanak (BKK) disalurkan mengikut bilangan kanak-kanak di dalam sesebuah keluarga miskin tersebut dengan kadar minimum RM100 bagi seorang kanak-kanak hingga kadar maksimum RM450 bagi 5 atau lebih orang kanak-kanak.

Manakala bagi Bantuan Am pula, hanya bagi negeri Perlis (RM70-RM200), Selangor (RM100-RM175), WP Kuala Lumpur (RM80-RM350) dan WP Labuan (RM80-RM350) yang mempunyai kadar RM100 atau ke bawah. Bantuan Am kebiasaananya diberikan mengikut bilangan individu yang uzur atau sakit di dalam sesebuah keluarga mengikut kriteria yang ditetapkan di peringkat negeri dan ianya diberikan apabila seseorang yang berkelayakan tidak sesuai diberikan skim bantuan yang lain.

Buat masa ini, pihak kerajaan tidak bercadang untuk menambah amaun atau kadar bayaran kebajikan memandangkan kadar terbabit adalah berpatutan dan telah mengambil kira keperluan semasa. Pada masa yang sama, Kementerian turut memberi tumpuan kepada pendekatan *productive*

*welfare* bagi membantu para penerima bantuan kebajikan keluar daripada kepompong kemiskinan.

**PEMBERITAHU PERTANYAAN DEWAN RAKYAT**

**PERTANYAAN : BERTULIS**

**DARIPADA : PUAN KASTHURIRAANI A/P PATTO [ BATU KAWAN ]**

**SOALAN :**

**Puan Kasthuriraani a/p Patto [ Batu Kawan ]** minta **MENTERI PENDIDIKAN** menyatakan apa tindakan yang telah dan akan diambil terhadap UiTM sebagai tuan rumah dalam seminar Anti-Kristian yang jelas bercanggah dengan Perkara 11 dalam Perlembagaan Persekutuan yang jelas akan memecahbelahkan rakyat Malaysia.

**JAWAPAN**

Untuk makluman Ahli Yang Berhormat,

Seminar “Kalimah Allah dan Kristologi Nusantara” yang dianjurkan oleh Universiti Teknologi MARA (UiTM) pada 6 Mei 2014 adalah satu program akademik dan perbincangan ilmiah bagi menerangkan permasalahan kalimah Allah yang menjadi isu dan perbahasan hangat masyarakat. Dalam seminar tersebut, perbincangan dan penjelasan secara ilmiah yang bersifat pro dan kontra selaras dengan budaya intelektual di peringkat pengajian tinggi berkaitan isu ini telah dijalankan dengan harmoni. Oleh itu, fakta dan perbincangan dalam seminar tersebut sepatutnya dilihat secara positif sebagai satu bentuk percambahan minda dan intelektual.

Untuk makluman Ahli Yang Berhormat, di awal program, peserta telah diingatkan bahawa tujuan seminar ini diadakan bukan untuk dicurigai, memperkecilkan agama lain dan bukan untuk menyerang pegangan dan kepercayaan penganut agama lain. Ini adalah semata-mata bagi pertahankan jati diri umat Islam di Malaysia dan memberi

kefahaman kepada penganut agama Islam sendiri yang diselubungi dengan pelbagai kekeliruan seperti isu penggunaan ‘Kalimah Allah’ dan cabaran serta ancaman yang dihadapi oleh umat Islam pada masa kini demi menjaga kesucian agama Islam.

Seminar ini difokuskan kepada pelajar dan jemputan dalam kalangan masyarakat Islam. Justeru, berdasarkan tajuk dan objektif seminar ini adalah jelas untuk menghurai kekusutan yang berlaku demi kepentingan hal ehwal masyarakat Islam di negara ini secara langsung dan masyarakat bukan Islam secara tidak langsung. Bahkan dapat memahamkan pelajar dan masyarakat seterusnya merapatkan lagi perhubungan antara pelajar dan masyarakat berbilang agama.

Rt195

**JAWAPAN SOALAN PERSIDANGAN DEWAN RAKYAT**

**PERTANYAAN BERTULIS DARIPADA: TUAN ZAIRIL KHIR JOHARI  
[ BUKIT BENDERA ]**

**JAWAPAN OLEH Y.B MENTERI PENDIDIKAN MALAYSIA**

**PERTANYAAN BERTULIS:**

Tuan Zairil Khir Johari [ Bukit Bendera ] minta **MENTERI PENDIDIKAN** menyatakan jumlah pelajar antarabangsa di UM, USM, UKM, UTM dan UPM, nisbah mereka kepada pelajar tempatan, senarai negara asal mereka serta perincian tahap pengajian (siswazah atau pasca-Â-siswazah).

**JAWAPAN**

Untuk makluman Ahli Yang Berhormat,

Jumlah enrolmen pelajar antarabangsa dan nisbah kepada pelajar tempatan pada tahun 2013, di Universiti Malaya (UM) adalah seramai 3,770 orang bersamaan 1 nisbah 6, seramai 2,215 orang bersamaan 1 nisbah 12 di Universiti Sains Malaysia (USM), seramai 3,091 orang bersamaan 1 nisbah 9 di Universiti Kebangsaan Malaysia (UKM), seramai 3,779 orang bersamaan 1 nisbah 8 di Universiti Teknologi Malaysia (UTM) dan seramai 3,704 orang bersamaan 1 nisbah 8 di Universiti Putra Malaysia (UPM).

Kebanyakan pelajar antarabangsa yang melanjutkan pengajian di kelima-lima buah Institusi Pengajian Tinggi Awam tersebut adalah berasal dari negeri Iran, Indonesia, China, Iraq, Nigeria, Yemen, Pakistan, Libyan Arab Jamahiriya, Bangladesh, Sudan dan sebagainya. Manakala tahap pengajian yang ditawarkan kepada mereka adalah terdiri daripada Ph.D., Sarjana, Diploma Lepasan Ijazah, Sarjana Muda, Diploma, Matrikulasi dan Profesional.